

Visoki predstavnik i specijalni predstavnik EU Inzko: RS ne smije kršiti Dayton i rezolucije UN-a



Visoki predstavnik i specijalni predstavnik EU, Valentin Inzko, danas se u Banjoj Luci sastao sa premijerom Republike Srpske Miloradom Dodikom. Visoki predstavnik i specijalni predstavnik EU na sastanku je istakao da bi odbijanje ovlaštenja koja su data visokom predstavniku predstavljalo ozbiljno kršenje kako Daytonskog mirovnog sporazuma tako i rezolucija Vijeća sigurnosti UN-a.

“U pitanju su najviši nivoi međunarodnog prava”, rekao je visoki predstavnik i specijalni predstavnik EU. “Odbijanje tih osnovnih principa značilo bi povesti RS na put pravne neizvjesnosti.”

Visoki predstavnik i specijalni predstavnik EU je ukazao na punu i jednoglasnu podršku međunarodne zajednice produženju mandata međunarodnih sudija i tužioca u Odjelu za ratne zločine Suda BiH i Tužilaštva BiH. “Od strategije sukoba ne može biti nikakve koristi”, rekao je Inzko.

Haški tribunal je tražio produženje mandata međunarodnih sudija i tužilaca kako bi BiH mogla ispuniti svoje obaveze vezane za strategiju zatvaranja tog tribunala. U toku sastanka visoki predstavnik i specijalni predstavnik EU je podsjetio na ranije izjave premijera Dodika u kojima je izrazio opredijeljenost RS za punu saradnju sa Haškim tribunalom. Visoki predstavnik i specijalni predstavnik EU je istakao da

se “ta podrška treba dokazati kroz djela.”

Visoki predstavnik i specijalni predstavnik EU je naglasio da bi strategija za rješavanje slučajeva ratnih zločina koju su usvojile bosanskohercegovačke vlasti bila dovedena u pitanje, a mogućnost provođenja istraga i suđenja u slučajevima ratnih zločina oslabljena ako bi se međunarodne sudije i tužioci povukli prije no što BiH krene sa provođenjem dobro pripremljene strategije nacionalizacije. “Ne mogu prihvatiti mogućnost da bi žrtve morale nanovo proživljavati užase koje su doživjeli zato što bi se suđenja sa novim sudijama iznova vodila”, rekao je visoki predstavnik i specijalni predstavnik EU.

“Jasno je da ulazimo u izbornu godinu. Međutim, ovo pitanje se ne smije koristiti u tu svrhu”, rekao je visoki predstavnik i specijalni predstavnik EU i zatražio da se više pažnje posveti ublažavanju posljedica recesije, otvaranju radnih mjesta i problemima najsiromašnijih slojeva društva u RS i BiH.